

Maart 29, 2017

www.awemainta.com

www.facebook.com/awemainta

noticia@awemainta.com

583-1400



AWEMainta



MINISTER DI TRABAO, DRS. PAUL CROES HUNTO CU GRUPO DI HENDE CU TA RONDON'E, TA SOSPECHOSO DEN INVESTIGACION PENAL



Prome Minister Mike Eman ta masha conmovi, pero

Lo laga husticia haci su investigacion pa na final pueblo haya claridad ta kico a sosode

E orden legal di Aruba mester por traha independiente

NET despues di e conferencia di prensa di Ministerio Publico, relaciona cu e caso di Minister drs. Paul Croes, Prome Minister Mike Eman a convoca un conferencia di prensa, unda por a mira un Prome Minister masha resenti, ora cu el a bisa: “Awe sigur ta un dia cu a commove nos tur. Tabata rond di 6 or di mainta, mi a haya yamada di Minister Arthur Dowers, kende a informe cu Husticia a dicidi di haci algun entrada hudicial e.o. na cas di Minister Paul Croes”.

“Loke ta pasando aki, sigur ta algo sumamente penoso. Penoso pa nos, pa gobernacion y sigur penoso pa Aruba.

Y na momentonan asina, sigur lo percura pa comunidad haya claridad riba dos tema importante y mi kier sigura tambe cu Orden Legal di pais Aruba, caminda ta importante, cu tipo di investigacionnan asina por tuma lugar, maske con fastioso cu nan por ta, pa haya claridad di kico a sosode”, tabata palabranan di Prome Minister Mike Eman.

Sigur e investigacion aki lo tuma lugar den un forma independiente y cu gobernacion ta respeta tambe independencia di autoridadnan di husticia, cu ta encarga cu tipo di investigacion asina.

Prome Minister Mike Eman por a compronde tambe, cu e investigacion aki ta consecuencia di algun denuncia haci, pero detaye di esakinan e no tin.

Hecho ta cu e caso aki ta pone nan tur para keto un rato, pensa riba e importancia pa tin estabilidad den nos pais, sigur despues di un bishita exitoso na Hulanda, segun Prome Minister Mike Eman.

Un noticia asina ta sacudi nos y ta conmove nos y lo duna husticia su espacio pa haci su investigacion.

Gobierno sigur ta para solidario cu e colega y su empleadonan, pero manera bisa, laga husticia haci su trabao, sin cu tin presion alguno.

Prome Minister Mike Eman no por bisa si Minister Paul Croes lo baha, pasobra te cu ayera el a keda di consulta cu su abogado, pa despues tuma su decision.





BAO guia di Ministerio Publico di Aruba, Landsrecherche, den cooperacion cu RST (Recherche Samenwerkings Team) y Cuerpo Policial di Aruba a investiga posible casonan di corrupcion activo y pasivo.

E investigacion aki a dirigi su mes riba e sospecho cu Minister di Asunto Social, Hubentud y Trabao, conhuntamente cu varios di su trahadornan, a tuma regalo, promesa y/of servicionan relaciona cu ontheffingnan di e arbeidsmarkttoets, dor di cual stranheronan a wordo poni den oportunidad pa haya permisionan laboral, segun Fiscal Mayor Erick Olthof ayera mainta den conferencia di prensa.

E Fiscal Mayor mes a keda sorprendi p'e cantidad di periodistanan presente ayera mainta.

Mr. Erick Olthof, den presencia di Mando Policial, Director di RST, Hefe di Landsrecherche a splica e proceso di ayera mainta.

Durante e investigacion, e sospecho a surgi cu Minister drs. Paul Croes a haci su mes culpable na ambtsmisbruik y a duna personanan cu no tabata mag di traha na Aruba a base di nan verblijfstitel, oportunidad pa traha na Aruba.

Tambe e sospecho a lanta cu e Minister a haci su mes culpable, conhuntamente cu

otroonan, di intencionalmente laba placa di e sobornonan ricibi.

E sospecho ta cu e ambtelijke corruptie ta consisti primordialmente di pidi y/of tuma sobornonan en cambio di ontheffing di e arbeidsmarkttoets.

Un arbeidsmarkttoets positivo di Departamento di Progreso Laboral (DPL), of un ontheffing di e toets aki, ta un condicion pa dunamento un permiso di trabao na Aruba dor di Departamento di Integracion Maneho y Admision di Stranhero (DIMAS).

Den cuadro di e investigacion, a haci entradanan hudicial ayera na 13 diferente lugar (cas, empresanan y un fundacion), bao guia di dos Huez-Comisario encarga cu tratamiento di casonan penal.

Den e huiszoekingen aki, tabata involvi personal di Landsrecherche, RST, Cuerpo Policial, FIOT (Fiscale Inlichtingen en OpsporingsTeam), FIOD (Fiscale Inlichtingen en Opsporingsdienst di Hulanda) y Marechaussee, cu sosten di otro partnernan strategico.

Durante e entradanan hudicial a confisca administracion y gegevensdragers. Nan lo dura henter dia, segun expectativa. N'e momento aki, Ministerio Publico a opta pa no detene

e sospechosonan.

Ministerio Publico y e team investigativo kier prome analisa e documentonan tuma den beslag y demas informacion, y scucha testigonan pa sigui sostene e sospechonan.

Relaciona cu e resultadonan di e analisis y e verhoorman, lo tuma decisionnan tocante persecucion, caminda no ta exclui cu detencionnan lo cay mas despues.

Di acuerdo cu Fiscal Mayor mr. Erick Olthof e motibo di e investigacion aki ta debi na diferente noticia riba Facebook, cu hopi biaha no ta corecto, pero despues di a haci un feitenonderzoek, di tende varios testigo, a conclui pa haci un investigacion penal. Sigur ora cu integridad ta na discusion, merece un investigacion profundo, cu por tuma algun luna, sib o kier haci un bon investigacion pa trece e claridad den publicidad.

Bisando tur esaki, Ministerio Publico a bari for di mesa, tur otro publicacionnan manera e.o. cu Minister Paul Croes y su señora mas Secretaria ta deteni.

Tambe a keda bari for di mesa, cu tur e investigacion aki tin di haci cu e container di droga cu sali for di Aruba, y cu a keda confisca na Hulanda.

Di acuerdo cu algun observador

Minister drs. Paul Croes mester retira y laga husticia haci su trabao

Si no tin nada, e lo por bolbe

AYERA mainta, un miembro di prensa a puntra e Fiscal Mayor, mr. Erick Olfhof si Minister Paul Croes mester retira, corectamente mr. Olfhof a bisa, cu esey no ta su competencia pa exigí esey. Su trabao ta pa haci un investigacion penal riba denuncianan haci pa determina si e mandatorio y su hendenan a viola ley of no pa despues persigui nan penalmente

di acuerdo cu ley.

Un rato despues den conferencia di prensa di Prome Minister Mike Eman, mesun pregunta a ser haci y e Premier a duna di conoce, pa duna Minister Paul Croes e espacio p'e pensa kico e ta bay haci. N'e momento ey, Paul Croes a bay consulta cu su abogado riba loke e ta ser acusa. No ta intencion di Prome

Minister Mike Eman pa exigí nada, y manera el a declara anteriormente, laga Orden Legal haci su trabao, pa cual nan mester tin espacio pa trece claridad den e caso fastioso aki.

Inocencia di un hende ta keda, te ora cu keda comproba cu no t'asina, pero na mesun momento mester duna respet na nos propio institutonan

pa duna espacio n'esnan cu ta haci un investigacion.

Si Minister Paul Croes mes lo retira, ta keda puramente na su propio persona. Den e siguiente oranan Minister drs. Paul Croes lo dicidi su decision, cu sigur Gobierno y partido lo sa di respeta.

Prome Minister Mike Eman a haya cu Paul Croes, ta un hoben promotor y asina el a dicidi dreña politica. Si e no a dreña politica, Paul Croes lo no a hay'e den un situacion asina, cu ta un situacion doloroso no solamente p'e, pero tambe pa su famia.

Combersando cu

algun observador, nan ta haya cu Husticia haci su trabao, sin ningun clase di presion, ta na su lugar pa drs. Paul Croes retira un rato como Minister y si e no ta culpable, semper e por bolbe den su puesto di Minister atrobe, maske cu eleccion ta net dilanti porta.



OM a keda cla cu e entradanan hudicial

Na cas di Minister Paul Croes, tabatin un señora trahando sin permiso

Awor e investigacion mes ta cuminsa

E entradanan hudicial ayera den diferente localidad (cas, empresanan y un fundacion) den e investigacion penal contra Minister di Asunto Social, Hubentud y Trabao, drs. Paul Croes y contra otro sospechosonan, ta cla.

Segun Ministerio Publico den un comunicado di prensa ayera tardi, durante e huiszoekingnan a wordo tuma den beslag un gran cantidad di administracion y gegevensdragers.

Den cuadro di e investigacion penal, a start tambe cu un Investigacion Financiero Penal contra dos di e sospechosonan, caminda a pidi informacion financiero serca varios institucion bancario.

T'asina tambe cu durante e entrada hudicial na cas di Minister Paul Croes a topa alabez cu un muher, kende tabata traha den cas di e Minister como maid sin cu e tabatin permiso p'esaki a base di su verblijfstitel actual.

El a wordo hiba pa Warda Nos Costa y ta actualmente wordo scucha.

Den e periodo benidero e team investigativo lo

dedica su mes vooral na analisa loke a wordo tuma den beslag y na sigui scucha e sospechoso y testigonan. Relaciona cu esaki, no ta exclui detencionnan.

Si bin desaroyonan especial den e investigacion, Ministerio Publico lo comunica via un conferencia di prensa manera ayera mainta, of via relacionan di prensa.

